



Tir Yimyim

www.tiryimyim.in

e-mail : tiryimyim@gmail.com



TAPAK 7

Vladimir Putin atema Russia tir
kümsük pongu buba tenzükogo

VOL. XXI ISSUE NO. 205 (ADOK 205) DIMAPUR RASEMNÜ (WEDNESDAY) MONUPII (MAY) 08, 2024 ₹ 5.00

Lok Sabha Elections Phase 3: Vote agütsür shilem 61.08 liasü

New Delhi, Monupii/May 07 (Agencies): Lok Sabha atema elections phase tenet lemsar aliba nungi phase tasem buba May 7, 2024 nikongdang 6:00 ako nung tembangogo, aser voter turnout shilem 61.08 liasü.

Mongulbarnü election nung Ato Kilonser Narendra Modi, Home Minister Amit Shah, Congress tir Mallikarjun Kharge aser danga party lenirtem aser nüngtugu nisungtemi vote agüja liasü.

May 7 nü Lok Sabha election phase 3 ya Assam (menden 4), Bihar (5), Chhattisgarh (7), Goa (2), Gujarat (26), Karnataka (14), Madhya Pradesh (8), Maharashtra (11), Uttar Pradesh (10), West Bengal (4), Dadra and Nagar Haveli aser Daman and Diu nung agia liasü.

Anungji iba phase ya ajanga Gujarat, Karnataka aser Goa nung polling tembanger.

Mongulbarnü Lok Sabha menden asoshi tokteper rongnung Amit Shah (Gandhinagar), Jyotiraditya Scindia (Guna) Pralhad Joshi (Dharwad), Supriya Sule (Baramati), Adhir Ranjan Chowdhury (Baharampur), Dimple Yadav (Mainpuri), Shripad Naik (North Goa), Badruddin Ajmal (Dhubri), Shivraj Singh Chouhan (Vidisha) aser Digvijaya Singh (Rajgarh) nunger ya tejak tejentem alitsü.

Anogo 30 tsünta J.Es 8 aser Program Officer kamapa nungi anenjang: CTAN

Dimapur, Monupii/May 07 CTAN ajanga Mongulbarnü agütsüba shiti nung shia liasü.

Department-i nübü agi anüngba indang mejembitsüla aser ozüng alema nübü shimba mapa meinyaktsüla, kechiaser NPSC Rule no. 9(4) (State, Civil & other services) nung Department ajaki ita 12 tsünta vacancy adoktsü ama alibatem requisition atema yoktsüla ta shia lir, ta CTAN-i ashi.

"Department ajanga mapang shidak nung post tazüng aiba indang data shidak agütsütsü atema nüngdakba mera agitsü onoki imlar. Anogo 30 tsünta contract nung shimoka aliba JE aser Program Officer ya mapa nungi anentsütsü akhanger, ta ashi.

Yamaji meinyakra, ozüng alema shima alirtem (appointees) tenüng onoki temai adoktsütsü aser democratic yimya nung onoki iba ken o bentetsü mera dangi yoktsü ayongzüker, ta

NBSE ajanga Compartmental Examination atema metedaktsü

Dimapur, Monupii/May 07 (TYO): Nagaland Board of School Education (NBSE) ajanga 2024 June ita tsünglangen agüja aliba tatidang balala agitsü atema routine tem metedaktsüogo:

1. HSLC Compartmental and Improvement Examination 2024
2. HSSLC Compartmental and Improvement Examination 2024

Regd. No. RNI. NAGAAO/ 2004 / 13113. Postal-NE/RN-717.

Tir Yimyim

tiryimyim@aolima

tir yimyim

TAPAK 8

Igor Stimac-i Bhubaneswar camp atema tanabuba list sangdongogo



Sorkar mapa inyaker nem contract mapa magütsütsüla: NCSU



Nagaland Contractors & Suppliers' Union (NCSU) lokti senden Kohima Village VDB Hall nung May 7, 2024 nü amendang tangokba noksa.

Dimapur, Monupii/May 07 (TYO): Nagaland Contractors & Suppliers' Union (NCSU) Head Office Kohima lokti senden May 7, 2024 nü Kohima Village VDB Hall nung mena liasü.

Iba senden nung menden NCSU Vice President K.L. Setuo Rutsa liasü aser Catechist Christ The King Church, Ruokuovituo Rutsa-i sarasadema iba senden tenzüka liasü.

NCSU Vice President Hoshito Assumi-i tarur pela agizükba o jembiba sülen Rüsokhrie ajanga temeja ken ka aten aser NCSU vice president N. Neilo Koza ajanga melepzung o jembia liasü.

Iba senden nung Tseminyu, Tuensang, Zunheboto, Dimapur, Kiphire, Noklak, Phek, Chümoukedima, Shamatore, Mokokchung, Peren, Longleng aser Niuland district tem nungi NCSU district unit lenirtem arua aden aser parnokia shilem tajung agia shisa lemsatepa liasü.

NCSU President Pele Khezie-i iba senden nung tir o jembidang district ajunga nung NCSU units amenokba atema pelaba melsatep aser unit ajak kanga yakyaka maparen balala inyaka aotsü ayongzüka liasü.

Nagaland nung NGOs aser civil society aika lir, saka Naga nunger

kin ajunga nungi kibong ka ama tashi ita tenzüka tentetji NCSU ya ka lir, anungji maneni külemi tashi ita aser telungjem nung alitsü merangteta inyaktsüla, ta pai ayongzük.

Lenla ajaklen terenlok asoshi NCSU-i maneni sorkar den külemi teka amteper inyaktsü, kechiaser Union nung züngsem ama Class-I contractors aika lir. Ajisüaka sorkar mapa inyaker aika lateta aliba temzung mamshir parnoki contract mapa inyaker, ta NCSU tiri ashi.

Aser item amala unregistered contractors yagi mapa junga meinyakteter aser tatem nung NCSU züngsemtem tenüng asener, ta pai jashiba lemsatepa liasü.

NCSU indang RTI Cell aser Quality Control Cell ajanga iba amala inyakym meittsu tamang akar ta pai ashi.

Nagaland nung sen crore meyirijang aika indang project tem angur aser iba ama project tem ajak dangalen nungi aruba contractor temi inyaker, anungji iba amala contract tulu angutsü atema asenok teka amteper külemi inyaktsüla, ta Khezie-i ayongzük.

Iba senden nung pangzung kar agizüka liasü aser itemji, state nung aliba sorkar department

ajunga nung yearly works programme mapa kuma inyaktsü NCSU-i khanga liasü.

Sorkari totuyuba agüja aliba ama NIT atema Open Tender alitsüla aser mapa ajak NCSU Card bena alirtem nem inyakdaktsütsü akhanger, ta pangjem.

Contract aser supply mapa ajak NCSU card holder nem dang inyakdaktsütsü ta jangjatsü asoshi küm shia Nagaland nung sorkar department ajak nung evaluation duty aotsü lemtet.

SOR (schedule of rate) tsünglangen alir nem work order magütsütsü, cluster tender system khenyongi memulunger aser NIT balala atema 'one project one firm' system amshitsüla, ta lemtet.

NCSU züngsem temi mapa renema inyaker bill mongui aliba atema sorkar den jembitsü aser iba atema October 31, 2024 tashinung NCSU Head Office nem application format agütsütsü lemtet.

State nung terenlok mapa tajungtiba nung inyaktsü mech GST aser Cess dak alaka Naga national group, state sorkar nung ministers/advisors temi saru meshiba mesüra Party Fund magütsütsüla, ta senden nung lemtet.

District jenjang nung tebilemtsütem aser mapa balala tajungtiba nung bentettsü atema lenmang bushitsü aser iba sentong ya tejakdangi bener aotsü atema ayongzüka lir, ta ashi. Laisa, iba sentong nung shilem agiba ajanga district kati ka dang nungi angazüktepba imlabla lemsatep.

Mission Director, National Health Mission (NHM) Dr. Akuo Sorhie-i, District representative tem den jembiba mapang, RMNCAH+N ya benokba mapang nungi tenzüka tanü tashi National Health Mission aser Department indang tongtiret

(Maneni tapak 2 nung...)

RMNCAH+N lepareprangshiba senden den repsema workshop tenzükogo

Dimapur, Monupii/May 7 (TYO): Reproductive Maternal Neonate Child Adolescent Health and Nutrition (RMNCAH+N) dak sendakba nung anogo ana atema state level lepa reprangshiba senden den repsema Workshop ka may 7 nü IDSP Hall, Directorate of Health & Family Welfare, Nagaland nung tenzükogo.

District RCH/ Immunisation Officers aser District Program Managers (NHM) tempelashishia tem den jembiba mapang, RMNCAH+N ya benokba mapang nungi tenzüka tanü tashi National Health Mission aser Department indang tongtiret

kümogo aser iba ya District Program Officers aser district Program Management staffs temi bendanga agüja inyakba ajanga lir, aser NFHS-4 & 5 (National Family Health survey) nung asenok indang Performance indicators temaleni tudar, ta ashi.

Ajisüaka Dr. Akuo-i, "1st ANC, 4ANC registration, Institutional Delivery, Full Immunisation amala tongtibang performance indicator tem nung tinyaktsü aika lir aser iba dak sendakba nung kechi matong ali aji bushiteta asenoki inyaktsüla," ta ashi.

Government School temi fee tali memeshitsüla: DoSE

Dimapur, Monupii/May 07 (TYO): Department ajanga sorkar nungi temelaba agir sangdongba ama mesüi Government School kar nung fee tali meshiba osangtem angazüker, ta Directorate of School Education ajanga

sangdong ka nung ashi.

Uniforms, T. Shirts, Neck Tie, Belt amala agütsüba school temi item oset atema jenjang tem nung pei School Management and Development Committees (SMDCs) nungi temelaba agitsüla.

Board ajanga mapang shia sangdongba nung ajemdaker NBSE fee ya yanglushitsü, ta sangdong ajanga ashi.

Department ajanga metedaktsüba Fee Structure sülen shidak anidaktsüla, ta DoSE ajangasa metedaktsü.

Aliba yimtak nung 3buba Züngi benjong ayongzüka agitsü



Dimapur, Monupii/May 7 (TYO): Ajaki kanga yongyatepa aliba Züngi benjong May 10 nü ayongzüka amungtsü atema Aliba yimtak renema lir. Iba benjong ya 2022 küm tenzükba sülen taküm agi tasembenbuba amungtsü lir.

Aliba yimtsüng ya Nagaland nung Mokokchung district kübok Ongpangkong tzükong nung lir. Yimtsüng ya sub-district headquarter Ongpangkong (tehsildar office) nungi km 3 aser Mokokchung

jila nungi km 15 pilar lir.

Benjong ayongzükba committee züngsem Suyimkumba Jamir-i ashiba agi, taküm iba benjomingmung atema renemshi tenzükogo, koba taoba mapang anogo ana munga aliba takümbo anogo ka dang amungtsü ta ashi. Anogo melenshiba indang jembiba mapang Jamir-i, züngi kanga kara yokmaba aser küm ka nungi küm ka ta tsüngsang mopung mongpu tamajungba küm aoba ajanga

tsünüsenpongstsü dak kongshiba kuli agütsü.

Paisa, takümbo züngi aongstsü atema benjong ayongzükba committee-i vegetable scissors lemtsüba indang metedakstsü, kechiyong iba ajanga züngi tezü kanga junga wazüka ayutsü aser züngi meraksai talirtem jangradema chidakstsütsü, ta ashi.

Benjomingmung mapang sentong balala ayongzüka agitsü, kong off-season züngi, chiyongstsü, metsü jangnatsü,

bio-pesticides, tools & anabnen), lijak implements, handicrafts, organic aonsotsütem, shiitake kashishitepb (nisungshia ajongmenok 5), aser karatsüng asemtepba (race 3) amaka tetoktepba tem ayongzüka asayatsü. Tetoktepba nungi shirnokisa shilem aginer parnoki agitetsü aser takokertem nem sempet agütsü.

Maneni Jamir-isa, benjong ayongzükba committee sesaksema sülen sentongtem indang osang tejangjaba metedakstsütsü, ta ashi.

CMHSS,Impur nung takok angur kaketshirtem nem tetushi agütsüba sentong aka



CMHSS,Impur nung takok angur kaketshirtem nem tetushi agütsüba sentong temer kelen takok angur kaketshirtem,ABAM lenirtem,Managing Board pur,school Principal,tesayurtem aser tsüraburtem külemi tangokba noksa nungji angur.

Mokokchung,May/ Monupii 23(TYO): Clark Memorial Higher Secondary School,Impur pur tanu taküm küm High School Leaving Certificate Examination(HSLCE) aser Higher Secondary School Leaving Certificate Examination(HSSLCE) nung takok angurtem nem tenüngsang agütsüba sentong agigo.

Tanu iba sentong nung School Managing Board Chairman Wb.C.Wati Walling-i tajungshi o jembi aser medemertemi ken tajung ka tena telok ayongzük, sentong nungsa Tsüngrem lenisüba

Asür.Rev.Pona Academic Award agütsüba nung Sb.Meyilong Ao aser Kr.Arensen Longchar tenati agizük. Class 10 nung takok angur 39 aser Class 12 nung takok angur 20 nem Principal Wt.Chubainla Jamir ajanga tetushi sempet agüja liasü.iba den ano School toktsür aortem tenüng nung Kr.Arensen Longchar-i tepila o jembi aser Jongpongstsüla aser

jazüka Wt.Moanaro-i aser ano Impur Baptist Arogonung A s s o . P a s t o r (W) Wt.Toshirena-i sentong nung Tsüngrem teyari adenba asoshi tenüngsang agüja sarasadembä den Wb.Imlakum kettangsüba nung iba sentong agi.

Tanu iba sentong nung ABAM nungi, School Managing Board, tsüraburtem aser Asür.Rev.L.Pona jabaso Planning and Transformation dept. nung Addl.Secy.Nungsangwapang dena liasü.

mepeshia metedakstsüogo. Minprong balala ajanga tatidang anepa anepa agitsü aliba nung tetsükdakstsü adokstsü akok, aser iba ajanga kaketshirtem tejakdangi aotsü aliba dak kongshitsü ana nung lir.

Maneni ANCSU-i, kaketshirtem dang tatidang ya pass asütsü atema dang masü, saka lenla ajak nung tangazükba akatsü aser nisung shia pei terenlok atema maongka ka ama agitsü ajungshia liasü.

ANCSU-isa, Nagaland sorkar Power Department dang tatidang agiba tepeyong electricity supply kecha tetsükdakstsü makai agütsütsü mepeshia metedakstsüogo. Kaketshirtem kecha tetsükdakstsü aser minprong makai rangloker lesson bushitetsü atema electricity tanenmakai agütsütsü ya kanga tongtibang lir.

Iba den bendenloksema kaketshir lokti tentet yagisa nübertem dang tatidang mapang nüngdak makaba nung kaketshirtem minprong masütsü

RMNCAH+N leparereprangshiba... (TAPAK1NUNGLI...)

Laisa, tetsü aser tanurtem nem health care tajungtiba agütsütsü atema Health & Family Welfare-i

RMNCAH+N ya benokogo, anungji District Program Officers temi iba ya tanga sentongtem den kasa kanga tongtibangsa agitsü ayongzük.

Maneni Dr. Akuo Sorhie-i, anogo ana iba sentong agiba ajanga, National Health Mission kübok state indang key performance indicators jenjang tali tajungba angatettsü, aser iba ajanga tejakdangi aotsü atema jenjang tapet agitsü asoshi telemtetba agitsü atema teyari agütsütsü imlabia lemsatep. Laisa, senden nung dena aliba kettangsürtem dang tali bendanga agütsüshitsü aser

Anogo ana tsüngda leparereprangshiba senden tembangba sülen Anemia Mukt Bharat, SUMAN, Laqshya, MusQan, Child Health, High Risk Pregnancy (HRP) tracking aser ePMSSMA, RBSK, Adolescents Health amala tongtibang inyakyimtem dak sendakba nung workshop ka agitsü.

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudakstsütsü"
				30.04.2024	02.05.2024	04.05.2024	
1	Dimapur	Bank Colony	Residential	76	147	176	$100 \mu\text{g}/\text{m}^3$
2		Dhobinala	Commercial	196	195	218	
3		NPCB Office, Signal Colony	Residential	104	115	148	
4		Tenyiphe, Chumoukedima	Commercial	51	66	87	
5		Nagarjan	Residential	100	85	113	
6		Viola colony	Residential	72	74	90	
7		Burma camp	Commercial	119	146	132	
8	Kohima	Opposite NST Office	Residential	73	35	65	
9		PWD Junction	Commercial	138	94	89	
10		High School Junction	Commercial	85	75	114	
11		Midland (Upper)	Residential	54	47	77	
12		Forest Colony	Residential	166	110	69	

Iba osang ya nübortem ajangzüksü atema Nagaland Pollution Control Board-i agütsür.



May 07, 2024 nü Lok Sabha election shilem tasembuba agiba anogo nung Ahmedabad nung Union Home Minister Amit Shah den pa kinüngtsü Sonal Shah, jabaso Jay Shah aser pa kinüngtsü Rishita Patel nungeri vote agütsüba sülen tangokba noksa nung angur.

Masala taila ton 15 apu; masala nung sün̄g powder aser acid liasü

New Delhi, Monupii/May 07 (Agencies): Delhi Police-i northeast Delhi kübok Karawal Nagar kiyong nung aliba factory ana nung masala taila ton 15 puogo, aser iba dak sendakba nung factory kibur ana densema nisung asem puogo.

Coriander powder aser sün̄gmok powder densema ner kidang amshiba masala tapu balalaji nisung achitsü atema tamajung asütsüa akok, ta parnoki metedaktsü.

Factory kibur ana - arrshi küm 46 Dilip Singh aser Sarfaraj (32) na den Khurseed Malik (42) nungeri masala tamajungji Delhi/NCR nung local markets aser dokan shishirtem dangi supply yoker aser jenjangji 'original' masala jenjang den kasa lir, ta police kettangser kati metedaktsü.

Police-isa factory ana nungji masala yangludang amshiba tou aser jang tashie, menjang tamajung, sün̄g anüksaba (saw dust), mersü, acids aser totzü apu, ta DCP (crime branch), Rakesh Paweriya-i metedaktsü.

Northeast Delhi nung factory kar nung 'brand' teniung balala amshia masala taila yangluba sülen market nung

ayoker, ta nisung kari police chemical densema lir, ta shia nem metedakja liasü.

DCP Paweriya-i, "Item osang nungji ajemdaker onoki team ka tenteta May 1 nü mita ao. Mita aoba mapang nung masala yangluba unit ka nung Singh ji kibur liasü ta jangja," ta metedaktsü.

"Parnoki jena aotsü merang saka police-i Singh aser Sarfaraj naprongla apuba sülen asüngdangyaogo. Singh-i factory kiburji pa lir ta nangzük aser Malik-i item masala supply asüba nangzükogo," ta paisa metedaktsü.

Maneni bushisüngdangba ajanga Kali Khata Road, Karawal Nagar nunga Sarfaraj-i factory ka nung masala tamajung yangluba putet, ta DCP-isa metedaktsü.

"Department of Food & Safety nem iba osang metedaktsüba sülen parnoki factory anaprongla nungjagi 'samples' bendena bener ogoogo. Ozüng kübok Arrla balala nung ajemdaker par asemprongla anema ken o benokogo," ta DCP Paweriya-isa metedaktsü.

India nung MDH aser Everest indang masala kar nung cancer adokdaktsüba

tawa Hong Kong aser Singapore nung item spices ayokba nokdangba sülen Food Safety and Standards Authority of India (FSSAI)-i item spices tendangtsü atema telemtetba agia liasü. Iba osang prokba sülen India tesem aika nung masala yangluba factory tem mita aor.

Taoba ita tomllen Singapore-i Everest indang Fish Curry Masala nokdanga liasü; iba masala nung carcinogen ta züngshiba ethylene oxide lir aser ibaji temelaba agüja aliba 'level' dang nungi tali lir, ta shia Singapore Food Agency-i metedakja liasü.

Parnokisa, 'ethylene oxide' ya chiyungtsü nung amshitsü temelaba agüja mali saka iba ya alu nungi züsentenba chiyungtsütem merüktettsü atema dang amshir, ta metedakja liasü.

April ita tetenzüklen Hong Kong nunga kettangseremi MDH indang Madras Curry Powder, Mixed Masala Powder aser Sambhar Masala aser Everest indang Fish Curry Masala nung 'ethylene oxide' keta aliba putetoga, ta metedakja liasü.

Congress-i nisung crore aika lakhpati kümduktsütsü: Rahul Gandhi

New Delhi, May 07 (Agencies): Mongolbarnü nisung crore aika 'Lakhpati' Congress lenir, Rahul Gandhi-i, Ato kilonser Narendra Modi-i tribal nisungtem meyong tzü, arem aser ali industrialist kar nem agütsüner, ta tai tongloksü.

Jharkhand kübok Chaibasa nung Lok Sabha election atema nüboym sentong ka nung jembidang Rahul Gandhi-i, Ato kilonseri nisung 22 billionaire

kümduktsü saka Congress-ibo nisung crore aika 'Lakhpati' kümduktsütsü, ta nangzük.

Paisa, iba election ya linük temzung kümzüktsü aser tribals, sensakertem aser maongka mangurtem temeden balala kümzüktsü atema lir, aser iba atemaji INDIA teloktep lenirtemi pei taküm-a tenlatsü melunga lir, ta metedaktsü.

"Ato kilonseri tribal nüburtem meyong tzü, arem aser ali industrialists 14-15 nem agütsüner. Pa küm 10 yimsüuba mapang nung pai nisung 22 billionaire kümduktsüogo. Onoki takok ngura onoki nisung crore aika lakhpati kümduktsütsü aser sensaker tetsürtem nem küm shia sen lakh kaka agütsütsü, ta paisa nangzük.



May 07, 2024 nü Lok Sabha election shilem tasembuba agiba anogo nung Karad nung Congress lenir, Sushilkumar Shinde den par kibong züngsemtemi vote agütsüba sülen tangokba noksa nung angur.

Maldives Foreign Minister Zameer-i India semdangtsü

New Delhi, May 07 (Agencies): Maldives Foreign Minister, Moosa Zameer-i May 9 nü India semdangtsü; ita trok tejaklen China pusemer, Mohamed Muizzu Tir akümba sülen tang mezüng iba linük nungjagi tongti kettangser kati India semdangser asütsü.

Ministry of External Affairs (MEA), Maldives Foreign Minister-i India semdangba ajanga linük ana tsüngda tesendaktep tajungba akümtsü imlar, ta metedaktsü.

Maldives Tir, Muizzu-i India

dang military platform asem nungi India nunger sepaitem aienshitsü metedaktsüba sülen linük ana tsüngda tesendaktep mejungi aküm.

India-i sepaitem teimbaka anir aruogo. Muizzu-i May 10 tashi nung par linük nungi India nunger sepaitem ajak aienshitsü tuyua lir.

Ministry of External Affairs (MEA)-i, Zameer-i External Affairs Minister, S Jaishankar ajurutsü aser linük ana tsüngda tesendaktep den regional onüktem nung o lemteptsü, ta metedaktsü.

Kerala nung bird flu putetba sülen an 53,000 dak tema tepsetogo

New Delhi, May 07

(Agencies): Kerala state kübok Alappuzha district nung bird flu putetba sülen kettangserem tetuyuba kübok tang tashi nung an 53,000 tepseta indokogo, ta Mongolbarnü kettangseremi metedaktsü.

flu putetba metedaktsüogo.

Ket d a n g s e r t e m i , Brihostibarnü ward number 9 nung kilometer 2 telongtet nung aliba an 6,777 shi tepseta indoktsü, ta metedaktsü.

"Taküm küm tenzüker tang tashi nung district nung an 53,455 tepseta indokogo. Cheruthana nung an 11,939, Edathua nung 31,811, Ambalapuzha North nung 540 aser Thakazhi nung an 9,165 tepseta indokogo," ta kettangseremi sangdong ka ajanga metedaktsü.

Supreme Court-i Delhi CM, Arvind Kejriwal nem bail magütsü



May 07, 2024 nü New Delhi nung BJP-i Delhi Chief Minister, Arvind Kejriwal anema longkak aitdang Police-i BJP Delhi Tir, Virendra Sachdeva den party nung inyakertem kar puer aodang tangokba noska nung angur.

New Delhi, Monupii/May 07 (Agencies): Mongolbarnü

Supreme Court-i Delhi chief minister aser Aam Aadmi Party (AAP) tongti lenir, Arvind Kejriwal-i bail meshiba temepishiba ken o angadang kecha magütsü.

hopta angadangtsü, ta metedaktsüogo.

Justices- Sanjiv Khanna aser Dipankar Datta nati akümba bench-i Arvind Kejriwal nem interim bail agütsütsü atema obendang magütsüi ken o angadangba tembang.

Mongolbarnü ken o angadangba mapang nung Supreme Court-i Arvind Kejriwal dang, nü nem interim bail agütsüra iba mapang nungjibo nai official mapa kecha meinyaktettsü, ta shiogo.

Ano külen Mongolbarnü Delhi nung court katia Arvind Kejriwal May 20 tashi judicial ket nung ayutsü anogo atsülangtsüogo.

Video conferencing ajanga AAP tongti, Kejriwal court matsüngdang nokdakba sülen CBI aser ED atema Special Judge, Kaveri Bawea-i May 20 tashi Kejriwal judicial ket nung ayutsü metedaktsü.



TIR YIMYIM YIMOBILEM (EDITORIAL)

DIMAPUR RASEMNÜ, MAY (MONUPII) 08, 2024

Theology kechiba azünger ?

Akhidang nungi asenoki angatetba kaji theology ya Tsüngrem tenzüktsü asoshi azünger. Tetezü, theology mazüngerbo Tsüngrem metenzüktyonga kecha masü amai asenoki angateter. Iba tangatetbaji kodang bilemdangdir, asenoki Tsüngrem tenzüktsü ta angatetbaji arogo aser mungdang nung ita sen chia inyaktsüba mapatem ya dang Tsüngrem tenzükba mapa amai bilemer. Iba lagi tanübo arogo nung sannüker aser sannüklai anir toklang tenzüktsü purtem asoshi arogo mapa nung shimtsü atema lateta yutsüba jenjangtem rongnung tongtibangtibaji pa mesura laji theology nung graduate ser aliba nisung ka asütsüla ta latetba ya asütsü. Atangji, kasa telatetbatem rongnung tanelä tsütsüa tashi itta alitsübajia lir, ajisüaka tanelä nung nisung ka Tsüngrem tenzüktsü asoshi bendanga agüja ali asü maliar, ajibo nisung nük agi reprangtetsübo tasak, anungji theology degree-ji dang nisung nük agibo angur. Ashiko iba lagi, talisa, tanü theology azüngertem rongnung Tsüngrem tenzüktsü asoshi academic degree tuluba aser temaba angutsü asoshi merangteper asütsüa akok. Ajisüaka, kodang asenoki jungjunga bilemdangdir, Tsüngrem tenzüktsü asoshibo arogoi latetba jenjang (criteria) ji masü saka Tsüngremi latetsüba jenjangjiang nüngdaker. Ibaji junga mangatetba agi tanü theology azüngertem aika Tsüngrem tenzüker masü, saka government nung ama, arogo nung ita sen chia arogo madak yimsüsür amai ka dang kümadokba angur. Ibaji Tsüngrem tenzüktsü asoshi tanelä khuret aliba agi masü saka theology azüngba agi arogo nung inyakba agi asütsü. Atangji, Tsüngremer mapa nung tenzüktsü asoshi Tsüngrem indang metettsüla, anungji theology azüngtsübajia tim, kechiyong theology tetezü Tsüngremer mapatem indang biledangta tamangba yimsü indang metettsü aser angazüktsü merangba mapatem lir. Ajisüaka, tanü putu nungbo Tsüngrem tenzüktsü asoshi theology azüngtsüla aser arogo nung sannüker aser sannüklatema theology azüngertem dang agitsüla ta asüba telatetba ya malitsüla. Aji oda, theology azüngyonga government, private aser business mapa inyaka Tsüngrem tenzüktsüa akok. Ano, theology mazüngyonga Tsüngrem aser Laishiba junga metetba aser tanelä temeshi agi sünga aliba taküm süra arogo nung santem anükba mapa inyaktsüa akok ta asüba tangatetba nung asenok arogo aser tamang aientsüla. Ibaji asenoki angatettsü atema asen lima nung Tsüngrem tenzüker Imchayanger adokba ya asütsü. Pa ya theology mazüng saka theology azüngertem dang nungi Lai o pai temetetba aser Tsüngrem o pai tajungba jembir, anungji theology azünger aika liaka asenoki theology mazüngsangang asentenshi aser Lai bushiba sentong nung tamshiba amshir. Iba tangatetba nung asenoki asenok arogotem anidaktsüra arogoi theology degree agi masü tanelä temeshi agi anitsü. Ajisüaka, tanü asenoki angatetba meshitak asüba agi, arogo aser arogotem agi akumba mungdang ya arogo nunger nübor tem meyong masü saka theology azünger kija meyong amai akumba angur. Iba lagi arogo nung züngsemtem o theology zünger toklang tenzükertem na tsüngda tepilaba -tephilaba akumba angur. Ibaji tanga agi masü saka theology azüngertem asoshi arogo aser mungdang nung inyakbaji dang Tsüngrem tenzükba mapa asütsü ta angatetba agi asütsü. Iba lagi ano külen, tanübo, theology zünger mapa mangur aika kümogo. Tsüngrem tenzüktsü asoshibo alima tashitemetet degree , scale of pay, service rule, ki aser gari menüngdaker saka item ajakji tedoktsüang toktsür Yisu sülen anidaktsü shia lir. Aji oda, alima tenzüktsü asoshia theology azüngersera tajungba asütsü ta asenoki angatetdi. Ibaji angateta theology azüngba, arogo nung inyakba aser Tsüngrem tenzükba tetezü aser nükjidong meteta nisung ajaki inyak nungbo aroga aser yimtena merük-merüker tajung sula.

OLEMSABANG

Lanurtemi Nagaland tasen ka yanglutsü tenzüktsüla

~ L. Kika Pongener.

Tanü asen Naga nunger nuburtem tulu-tila, takar-sensaker aser tetsür-tanur tashi mulongjang taroktiba nungi aginua ola adokbaji, Nagaland tasen ka aginur. Naga nunger nutsüng-nubur ajungai Naga lima tasen ka yanglunur. Surabangla, kechi koma-ka inyaknung tasen kuma yanglushitetsü...??? Alinuk tasen mesura lushi tasen ka yateta aser mesemteta kümpter yanglutsü asü...??? Mesura tang aliba nutsüng nuburtem ya ka danga medeni nutsüng-nubu tasen dang telok ka longjemer yanglutsü asü...??? Aji oda, Nagaland tasen ka yanglutsü atema alinuk aser lushi tasen ka nung nutsüng-nubur telok tasen ka, tanga lima nungi anir arua yanglutsüba masü, saka tang telidak lushi nung aliba nutsüng-nuburtemi yanglutsü. Aser aji tangari masü, lanur tazünger (Educated youth) -temi longjemer yanglutsüla.

Tanü asen Naga lima nung lanur zünger mapa mongui alir (Educated Un-employed) lakh tera mejungi lir. Anungji item lanurtemi longjemer Nagaland tasen ka yanglutsü asoshi 'Revolutionary Movement' ka tenzüktsüla. Atangji, lanur tazünger (Qualified) -temi longjemer Political Party tasen ka tenung jateta tenzüktsüla, saka iba Party nungji tang teinyakdak Minister, MLA, Ex-Minister, Ex-MLA aser Retired Govt. Servants kata madentsüla. Lanur temeja longjemer tenzüktsüla. Iba Party lagi sorkar nungi tenzüker loktiliba ajak nung ochimashi (Corruption) anema nokdaktsüla. Ajiser, iba Party-ji kodang kanga junga renemetedir (Set-up) General Election nung Constituency roker (60) prongla nung Candidate tetemu nubu shimer Contest asütsüla. Ano lanur tashi-tait rogo 'Volunteer' shimteter Constituency ajak nung supokrem amshiba, yi amshiba, vote sen-yong ayokba, item ajunga ajang-ajanga tenuk yoka meita reprangtsüla. Ajiser, vote enokba anogo (Polling day) nunga item Volunteer-tem lagi acha-ayanga Constituency ajak nung nisung kari yimer ajunga Vote enoktsüba meita reprangtsüla aser pei Vote pei sasa enokdaktsütsüla.

Küm ishika süia ogo, Assam lima nung lanur tazüngetemi 'Revolutionary Movement' ka tenzüka, 'Asom Gana Parishad' (AGP) Party tenzüker, lanurtemi longjemer tasü-ita apusoba, parnok mezüng Election nung shilem agiba küm-ji Absolute Majority adoka takok ngur, Prafulla Kumar Mohanta Chief Minister sur Government Form sur, Assam sorkar aniba asenok ajaki ngua ajangshia aruogo. Aji oda, term ka-ana kanga junga anir aoba ajangshia aruogo. Ajisuaka, tesasatsüka, parnok rongnung kar sen nung metsüdaker alang aser parnok tsüngda nung telemsa adoker, iba Movement-ji tashi meiti kuma-ao, saka tanü tashi iba Party-ji mesui taküm lir. Atangji, lanurtemi pei lima yanglushitsü molungteter longjemer apusora, asen lima nunga takoktsü lenmang sadema dang lir. Ajisuaka, iba mapa tamakok malutsü asoshi tamasyongi parnok tsüngda nung 'Küsum' chitepa, sign sutepa nangzükterepor dang apusotsüla. Lanurtemi dang asen lima yanglushitsü mulongtetra, senotsü meintoki merük-merüka inyaktsü temzüng-ozüng takang bangzüngä yanglur tenzüka inyakra, 'Clean Election' yimyim-to asangsang nung takok angutsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazüngeri angateta agitsü mepishir



Dimapur nung Doulos Theological College pur 10 buba Convocation sentong May 07, 2024 nü agiba mapang College choir-i ken atenba aser taküm küm graduate asürtem noksa nung angur. DTC nungi taküm küm graduate asürtem rongnung M.Th (Distance Education) nung ka, Master of Divinity (residential) nung ana, Master of Divinity (Distance education) nung asem, Bachelor of Theology (Residential) nung 9 aser Diploma in Theology (Residential) nung ka liasü. DTC ya Asia Theological Association (ATA) nung züngsem ka lir. DTC nung Dr.Onen Jamir, president aser Rev.Dr.Nuklu, principal lir.

Oxford nung Khristantemi Yihuda nunger pusema sentong ka agi

May 07, 2024: 'Holocaust Remembrance Day' mangashi ama metoktsüsü. Nisungtem temelung meyipdaktsüsü atema Khristantemi inyaktsü," ta metedaktsü.

Iba sentong ya 'March of Life' campaign den sendaktepa liasü. May 06 nikongdang 3:00 ako nung Oxford nung Khristantemi akhidang Yihuda nunger leper ka nungi procession tenzük aser Bonn Square nung sentong tembunga liasü.

Oxford nung Khristantemi tang mezüng iba sentong ayongzüka mongogo aser tarutsü nunga küm shia amongtsü imlar.

Iba dak alia London, Cardiff, High Wycombe, Bristol, Belfast aser Bournemouth yimtitem nunga kasa sentong ayongzüka agiogo.

Shilem agirtemi alima nung Yihuda nunger sempaba aser kin/sentsü nung ajemdaker nisung bendangshidanga züngshiba anema linük balala indang wako amer shilem agi.

Oxford's March of Life coordinator, Dr James E Patrick-i, "Yihuda nunger sempaba anema Khristantemi shilem agir. Asen tembar Yihuda nungertem sempaba aser Israel sempaba ya onoki

mangashi ama metoktsüsü. mezüngü United Nations General Assembly senden nung iba anogomongji UN nung züngsem linüktemi amongtsü lempta liasü, aser iba mapang nungjagi tenzükä küm shia iba anogomong monga aradar. Iba anogo amongba nükjidong ya, tarutsü nungbo nisung jenti tepsetba tanaben lephria mataloktsü atema 'Holocaust' putiotsü dak sendakba nung educational programs agitsü iba den külemi tamangba yimsü nung ajemdaker tesempa mapa inyakba aitsütsü aser meimchir temeten akhümmtsübutü nükjidong nung amonger.

International Christian Embassy Jerusalem nungi Len Grates-i, "Asürtem bilemtettsü atema onok yangi lir. Yihuda nunger pei linük aser bendanglen naprongla nung sempapa mapang nung onoki parnok (Yihuda) pusemtsü atema telemtetba agiogo," ta metedaktsü.

World War II mapang nung Yihuda nunger million 6 tepsetba bilemteta küm shia alima linüktemi 'International Holocaust Remembrance Day' ayongzüka amonger. Iba rara mapang nungsa Nazi Germany-i Romani nunger 200,000, matamabensar 250,000 aser kasa o kasa shi nung medemer 9,000 tashi tepseta liasü.

2005 küm November ita

ajungmeso," ta metedaktsü.

Kelly Merryman Hoogstraten-i, "The Wonder Project nung onok nükjidongji tamang jenjang tanaben asüngsashidaktsüsü atema amangtettsüsa ortsü lemsatepba asoshi lir. Onoki iba ya inyaktettusa Amazon MGM studios-i yariba atema pelar," ta metedaktsü.

"Iba tezungzüktep kubok mezüngbuba project ji 'House of David' lir. Iba ya WONDER Project atema alizüng ka tongtetba lir. Onok angatetba aser onok mission nungitba company ka den külemi inyaktsü, anungji onok kanga pelar," ta The Wonder Project nungi Jon Erwin-i metedaktsü.

Amazon MGM aser Wonder Project nati 'House of David' atema longjem **May 07, 2024:** Amazon MGM Studios aser The Wonder Project nati longjemer 'House of David' series tenzükogo aser iba ya Prime Video nung dang sayatsü.

'House of David' ya mapang ka nung tashi tulu aliba Saul Chuba pa mezümküm ajanga laoba indang otsü lir. Ainkar kati pa atsüngdoktsü atema renema sannüker David Israel chuba asütsü atema mezüja shmidteter. Saul tamajungba-tamajungba dang jashiba mapang nung David-ibo temeim dang proker. Iba series ya Chuba ana aser yimli ka dang asübayong tongbang raraba indang lir.

Producer, Jon Erwin aser entertainment executive Kelly

ANOGO ABEN TSÜNGREM DEN

Asenok ama

"Ne tenzükertemi kanga tasü ita Ne o jembitsü melaang" (T.M. 4:30)

Missionarytemji Tsüngrem masü. Tepilaji ya, asenok mena alidang parnok aotsü shmidtet. Asenok tembartem den tebilemtsü akar. Missionary wadang nung kijia noktaker. Pa tanelaren tebilemtsü jenti. Külem inyakertemjia külem timatem. Parnoki koda asen sarasadem nüngdaker. Parnok tatidang nung metsüktsü sarasademdi.

Missionarytem temang anema alitsü asoshi sarasademdi. Mopung majungba ajanga, tzü tamajung ajemba ajanga anema malir. Parnok ainlen jajadang lendong nungi kümzütsü sarasademdi.

Missionarytem senzütsü timtem lir. Teyari parnok nüngdak ajakbo meperitedaktsür. Manguba nüngdak adoker. Kechisarena akabaji masü saka senji nüngdaker.

Tenzükba nung missionarytemi ajuruba timtem asoshi asenoki sarasademsütsüla. Timtem aika lir. Aoksa Demasi telok toktsü (2 Tim. 4: 10). Obang mapu nung Barnaba balakai ao (T.M. 15: 36-40). Trohimas shirangba agi telok tashi ajema aküm (2 Tim 4:20). Kodang asenoki sarasademsdir item timtem ajak bilemtettsula.

Missionary asoshi sarasademjang.

Alima atema teimlaji Arogo lir: Pastor Wilfredo Vásquez



Pastor Wilfredo Vásquez

May 07 (Agencies): El jana indokba maparen kanga Rincón, Honduras nung pastor,

Wilfredo Vásquez leniba nung alima tzü-mopung kümzütsü atema maparen ka tenzükog; talisa plastic jana agi alima menenba nokdangtsü atema pai anir iba mapatong tenzük.

Vásquez ya El Rincón jila nung Wesleyan-Arminian indang Church of God Arogo nung pastor lir. Pai jana tebilemtsü anema mapatong tenzükba sülen alima nung Arogo lenirtemia kasaji inyaktsü imlar.

Church of God Tenla kima banner ka nung, "Alima menenba masü saka bentetba nung shiilem agirtem südi," ta zülia lir.

Osangbener den jembidang pastor-i, "Asen aliba tesem nung asenoki temelenshi aginüra asenoki Tsüngrem chirtem atema temelenshi adoktsü atema inyaktsüla, kechiyong alima atema teimlaji Arogo lir," ta ashi.

Paisa, "Jana mashie indokba ajanga kanga sensak tia nung alirtem tamajungba kongshir, iba denji külemi Tsüngremi yangluba tepor tajung lima raksatsür," ta metedaktsü.

Tearfund nungi Miriam Moreno-ia pastor Vásquez lenisüba nung alima tzü-mopung menenba nokdangtsü atema inyakba asoshi pa nem tenungsang agütsü.

"Pa ama lenir kati pai ahangshiba aser inyakba lemsatepba ya ajungmesoba ka lir. Khristan ka ama tangar-a ajungmesotsü aser tangari kechi inyakerar ibaji metettsüji kù teinyaktsü mapa, ta ni bilemer," ta Miriam-i ashi.

Tearfund nung lenir kati, "Alima tesem balala nung Khristantemi Tearfund indang Rubbish campaign nung shilem agir, kechiyong nisung ajakji jana nungi kümzüka jangratema taküm alitsü atema Tsüngremi yangl, ta onoki bilemer," ta metedaktsü.

Paisa, "Jana mashie indokba ajanga kanga sensak tia nung alirtem tamajungba kongshir, iba denji külemi Tsüngremi yangluba tepor tajung lima raksatsür," ta metedaktsü.

Israel-i Rafah amak tenzüker, Gaza border crossing amokbang

Tel Aviv, Monupii/May 07

(Agencies): Israel sepaitemi Gaza indang Rafah border crossing tem amokbangogo, anungji humanitarian aid aotsü aser civilian tem takum kumzuka alitsü teimla aliba ajak samaogo.

Mongulbarnü Israel mitkari ashiba agi, parnoki Gaza tsütsü border post nung "operational control" agiogo, koba ajanga Gaza Strip ya Egypt den sendaktepa liasü. Tongtipang lenmang shibanger Rafah yimti tiyong nung tanks tem yokba ajanga rara anena atatsü jembishinü telidak süaka Israel-i iba yimti amaktsü temulungtetba sayur.

Mongulbarne 401st Brigade ya Rafah crossing alema ai, ta Israel mitkari ashia, koba Gaza telungi teyari yokba aser civilian tem Egypt leni jena aotsü akokba lenmang tongtipang ka shibanger alitsü.

Iba arütsü alema senzüba tesem ya kiralongra mapa asoshi amshi aser Deobarnü Hamas-i mortar amshia Karem Abu Salem crossing - koba dang Israel nunger Kerem Shalom ta ajar - nung amakba ya iba tesem nungi liasü, ta Israel mitkari ashir. Ajisüaka parnoki tai tongloktsüba medena kuli magütsü.

Hombar aonung Rafah anüdoklen tesem kar amakba mapang iba arütsü ya shibanger. Tayimtsü nung nisung aliba kinung bomb poklokja nisung 12 tepset.

Israel mitkarib sangdong ka nung parnoki Rafah anüdoklen Hamas targets aika amak aser par züngsem 20 shi tepset ta

ashi.

Israel sepaitemi arütsü alema senzüba tesem amokbanger khen atema shibanga aliba ya Palestinian Crossings Authority indang odongtar-ia shiogo.

Yimjung asoshi linük balalai tetsüngtai aita jembiba tezungzüktap ka agizüktü mulungogo ta Hamas-i Hombarnü shiaka iba yimti ya amaker.

Hardline nationalist coalition partners temi Rafah nung tashi ajak amshia amaktsü akhangba ama Israel Ato Kilonser Benjamin Netanyahu-i mulunga lir.

Israel mitkar temi Rafah anüdoklen ali atsünga aitba mapang Hamas den kanga sashia khatepa liasü aser tayimtsü nungi bomb pokloktsü, ta Rafah nungi osangbener kati ashi.

Israel-i border post amokbangba ya tebilemtsü khuret tulu lir, kechiaser Palestine nungerem Gaza alema motettsü, ta pai ashia.

Israel tembar linük temi iba yimti ya amaknunbo civilian aika asütsü ta shiaka Israel-i Rafah nungi civilian tem anishidaktsü sentong nenshia ashi aser yangji aliba Hamas command aser par züngsem dak amaktsü apuso.

"US, European Union züngsem linüktem aser linük balalai mepishia Netanyahu dang mamaktsü shiaka Rafah nung ano amak tenzükogo. Iba ya ajanga ano civilian aika asütsü amatsü tsüboa bilemer. Gaza nung nüberem kumzuka alitsü tesem maka," ta EU indang top diplomat Josep Borrell-i ashia.

Hombarnü Israel sepaitemi

Rafah nung aliba Palestine nunger million 1.4 dak tema dang iba yimti nungi ainshitsü totuyuba agüja liasü, shirnok Israel mitkari taoba mapang totuyuba agütsüba sülen tesem balala arua jenoker timba lir.

Israel army ajanga Mongulbarnü tesem balala nungi arua jenoka alirtem aser Rafah anüdoklem mapa inyaka aliba international humanitarian organisations tem dang khen atema ainshitsü nenshia ashia.

Ajisüaka Rafah nung jenoka alirtem achi-ajemtsü mesüra mozü peria monguaka parnok taolen tesem kangabo mali.

Iba mapang ano arütsü alema senzüba tesemtem shibangba ajanga chiyongtsü agi anüngapongba tali akumtsü aser raraba tesem nungi taolen makai akumtsü.

Arütsü alema senzüba tesem shibangba ajanga teyari oset sera aliba gari tem Rafah yimti telungi moteti anena lir ta osangtem ajanga ashir.

Tang tesüsa Israel nunger operation ya ajanga yangji aliba nüberem tzükumlen al-Mawasi leni nunger aor, kong field hospitals, tents aser medical supplies yua lir, ta mitkari ashir.

October 7 nü nungi tenzüka Israel-i Gaza tesem balala nung makyonga arudang Palestine nunger nisung 34,789 tepsetogo aser 78,204 yirua lir, ta Hamas meyong health ministry ajanga ashir.

Tesüiba ghonda 24 tsüngta nisung 54 tepsetogo aser 96 yirua lir, ta Mongulbarnü sangdong ka nung ashia.

amunger.

SBU ajanga ashiba agi, tasa yanglur temi pa aliba tesem metettsü atema itdangiter ka amshi, aser iba sülen parnoki rockets aser drones amshia amaktsüba liasü.

Pua alir officer kati drones aser anti-personnel mines alir liasü, ta SBU-i ashia.

Ibai Putin nem pa inauguration masüdang sempet ka ama agütsüba liasü, ta SBU head Vasyl Malyuk-i ashia, tetetzü Putin kümsük pongu buba tir inyaktsü Mongulbarnü tezungzüktap magidang iba maparen tembanger alitsüba liasü.

Russian special services indang operation nung tamakok ajuru, saka tsükhir tashi tait aser tajangshiba jenti lir ta asenoki kodanga mamadoktsüla, ta Malyuk-i ashia.

FSB nung inyaker nisung asemi achayanga iba maparen inyaka liasü, ta SBU ajanga

Parnok rongnung Dmytro Perlin ta sur nisung kati 2022 küm February ita nungi tenzüka Russia-i tashi ajak amshia Ukraine amak metenzükang nungi itdangiter shima liasü.

Ano FSB nung inyaker Oleksiy Kornev yagi kishi nentepa aliba European linüktem nung senden balala mena liasü aser iba mapang Mongulbarnü apur Ukraine nunger colonels rongnung kabu ajurur liasü.

Vladimir Putin atema Moscow, Monupii/May 07
(Agencies): Vladimir Putin kümsük pongu buba Russia tir inyaktsü Mongulbarnü Krelmin inauguration nung tezükogo, anungji pa ano küm trok iba mapa inyaktsü, shibai yimtengsüba tsütsü pa den tokteper samatsü, Ukraine nung rara tesashi ka tenzük aser tashi ajak pa kabu nung aitdaktsü.

Grand Kremlin Palace telung nung sentong agidang Putin-i pa tena Russian Constitution nung nemet aser aji kumzuka ayutsü

KONANG TETUSHI AGÜTSÜR



Nagaland Board of School Education, ajanga agiba tatidang HSSLC tatidang agiba nungi Wb. S. Imtonen Pongen aser Watsü. Chubasenla Jamitsür dena jabaso Sb. Akolendang Don Bosco Jr. Sec. School, Dimapur, nungi Top 2 Arts Stream jenjang ajangzükteta tenüngsang bener arutsü nung Soyim Pojo Asem Aong Menden, Ungma Mokokchung-i konang tetushi agütsür. Tarutsü anogotem nunga nü kaket Reju wadang nung takok tulu ngutettsü asoshi anema aliba taküm arishi moajangma.

Ano shirnokisa HSSLC aser HSLC nung takok tulu ajangzüktetogo, Soyim Pojo Asem Aong Menden-i nenok ajak nem konang tetushi agütsür.

Sd-

1. Shri. Imküm Pongen. Tatar
2. Shri. O.Tinu Lkr. Tatar
3. Shri. Matsüng Salong. Tatar

DIMAPUR MISSION HR. SEC. SCHOOL

Churches Colony, Khermalal, Dimapur, Nagaland

e-mail: dmhssdim@gmail.com

POST VACANT

Applications are invited from interested candidates for the teaching post of **Political Science** in Higher Secondary Level (Both fresh & experienced). Educational Qualification: M.A (Pol. Science), with B.Ed.

An application letter along with photo copies of academic documents starting from HSLC can be submitted at the school office on or before 18th of May 2024.

Chairman
School Governing Board
DMHSS

ALI
TAYOKTSÜ
LIR

NAGA UNITED
5160. Sq. Feet - 91 x 60
Contact No. 9402988921

GOVERNMENT OF NAGALAND PERSONNEL & ADMINISTRATIVE REFORMS DEPARTMENT

(ADMINISTRATIVE REFORMS BRANCH)

NAGALAND: KOHIMA

Email: admreformsbranch@gmail.com

ADVERTISEMENT

Dated: Kohima, the 7th May, 2024.

No.AR-8/NSSB-5/2020 : In pursuance to Section 5 of the Nagaland Staff Selection Board Regulations, 2020, applications are invited for filling up the posts of 1(one)Member under Nagaland Staff Selection Board (NSSB), Government of Nagaland in the manner prescribed below:

NAME OF THE POST :
Item : 1 (one) post of Member

ELIGIBILITY CRITERIA :

At least 25 years of experience in public administration, public service and academics for appointment to the post of Member provided that there should not have been any disciplinary action taken against them during their service.

For further details of terms of employment, please see NSSB Regulations 2020 available in Department's website [nssb.nagaland.gov.in](http://www.nssb.nagaland.gov.in).

NOTE :

- a. While submitting the applications, the candidate is requested to submit biodata/ service details/ experience in the proforma at Annexure-I attached which can also be downloaded from the Department's website.
- b. Last date for submission of application shall be within 20 (Twenty) days from the date of publication of this advertisement.
- c. Online application will be accepted vide official email: admreformsbranch@gmail.com.
- d. Only Indigenous Inhabitants of the Nagaland State can apply for the above posts as per the P & AR Department Notification No. AR-8/8/76 dated 28/04/1977.

Sd/- J. ALAM, IAS
Chief Secretary to the Govt. of Nagaland

Vladimir Putin atema Russia tir kümsük pongu buba tenzükogo

nangzük aser iba mapang teshimtet tongtipang nisungtemi repranga liasü.

"Asenok ya lungjema aniba nüberem lir aser asenok külemei tetsüdkaktsü ajak ajangtettsü, asen sentongtem takok ngua inyaktetsü, külemei asenoki takok anguttsü," ta Putin-i tenangzükba agiba sülen ashia.

1999 küm tir Boris Yeltsin melenzükba sülen Putin-i Russia ya rongsenketzung nung tashi mait aliba nungi alima security anakshitsüsa anitet. World War (Maneni tapak 8 nung...)



"Believe in your dreams" omen dak rangloker 'Kids Athletics Day' nüngtem Mokokchung Athletics-i ayongzüka Mokokchung Imkongmeren Sports Complex nung tanurtem asoshi asemtepba sentong ka akaba mapang asemtepba telesma balala nung takok angurtem den tayongertem küleme tangokba noksa nung angur. Asemtepba arishi küm telesma yamai liasü - arishi küm 4-7, 8-11 aser 12-14. Takok angur mezüng aser tanabuba jenjang nem senpet medal den certificate aser gift hamper agi senpettsü. Mokokchung, 7th May, 2024.

Igor Stimac-i Bhubaneswar camp atema tanabuba list sangdongogo

Monupii/May 7, 2024 (Agencies): Kuwait aser Qatar na den FIFA World Cup 2026 preliminary joint qualification round 2 masayat tsüngda India senior tebur football team coach Igor Stimac-i Mongolbarnü Bhubaneswar camp atema asayar 15 densema aliba tanabuba list sangdongogo.

Asayartem mezüngbuba list Honibarnü sangdonga liasü.

Mezüngbuba list nung asayar 26 training Odisha nung May 10 nü tenzüksü. Tanabuba list nung asayar 15 densema lir aser parnok camp nung May 15 nü nungi adentsü. Iba list nung Mumbai City FC aser Mohun Bagan SG nungi asayartem densema lir, shirnok ISL Cup final asaya liasü.

Ajaka senteper iba national camp nung asayar 41-i shilem agitsü. India team Group A nung tatembangbuba asaya ana ya

mezüngbuba June 6 nü Kolkata nung Kuwait den asayatsü aser June 11 nü Qatar nung oa asayatsü.

India team-i asaya pezü nungi point pezü nguteta parnok telok nung tanabuba jenjang nung lir. Iba telok nung temaba jenjang nung tembangba team ana FIFA World Cup Qualifiers tasembuba round atema qualify asütsü aser AFC Asian Cup Saudi Arabia 2027 atema qualify asütsü.

Bhubaneswar camp atema tanabuba list nung asayartem:

Goalkeepers: Phurba Tempa Lachenpa, Vishal Kaith

Defenders: Akash Mishra, Anwar Ali, Mehtab Singh, Rahul Bheke, Subhasish Bose

Midfielders: Anirudh Thapa, Deepak Tangri, Lalengmawia Ralte, Lallianzuala Chhangte, Liston Colaco, Sahal Abdul Samad

Forwards: Manvir Singh, Vikram Partap Singh

Honibarnü sangdongba mezüngbuba list nung asayartem:

The first list of 26 probables for the Bhubaneswar camp (training from May 10):

Goalkeepers: Amrinder Singh, Gurpreet Singh Sandhu.

Defenders: Amey Ganesh Ranawade, Jay Gupta, Lalchungnunga, Muhammad Hammad, Narender, Nikhil Poojary, Roshan Singh Naorem.

Midfielders: Brandon Fernandes, Edmund Lalrindika, Imran Khan, Isak Vanlalruatfela, Jeackson Singh Thounaojam, Mahesh Singh Naorem, Mohammad Yasir, Nandhakumar Sekar, Rahul Kannoly Praveen, Suresh Singh Wangjam, Vibin Mohanan.

Forwards: David Lalhiansanga, Jithin Madathil Subran, Lalrinzuala, Parthib Sundar Gogoi, Rahim Ali, Sunil Chhetri.

KDAA-i ayongzüka Kids Athletics amogomung mungogo



Kohima, Monupii/May 7 (TYO): Kohima District Athletics Association (KDAA)-i Mongolbarnü Kids Athletics anogomung nüngdem nung Secretariat Junction Kohima nung tetsür aser tebur tanurtem atema asemtepba ka ayongzüka asayaogo. Iba sentong ya "World Mile Challenge" omen nung ajemdaker agia liasü.

Iba sentong nung Kohima kubok school balala nungi tanur 100 dak temai shilem agia liasü.

Asemtepba ya Nagaland Athletics Vice President aser I.G Stadium Administrator, Dziesebeinuo Vizo-i tenzükja liasü.

Sentong nung o jembiba mapang lai, Kids Athletics Day ya alima ajunga nung International Body for Athletics-i ayongzüka amungba anogomung ka lir. Iba ya World Athletics, Athletics Federation of India aser Nagaland Athletics tawabangba kubok amunger ta ashi.

Iba ajanga lanurtem nem sport tanüla benjungtsü atema maongka agütsüba den asaya nung parnok sempet jangjatsü asoshi maongka agütsür, ta lai ashi.

Sentong nungsa KDAA tir Thefungunu Solo-i lokti pela agizükba o jembiba mapang, Kids Athletics Day ya küm shia amungba sentong ka lir, koba tanurtem yongtsü nung fitness, sportsmanship aser libaliro tajung ajungkettsü nükjidong nung amunger, ta ashi.

Mkg nung under 14 Catch Them Young Tournament asayatsü

Dimapur, Monupii/May 7 (TYO): Department annual calendar of activities dak ajemdaker District Sports Officer Mokokchung-i ayongzüka Under 14 Catch Them Young Tournament ka GHS Mokokchung Compound Ground nung asayatsü. Asayamung ya Sepaktakraw Regu event atema asütsü. Anungji iba asayamung shilem

agitsü jangraba school temi parnok shilem agitsüba osang tejangja District Sports Officer office nung office mapang agütsü metedaktsüogo.

Asayamung dak sendakba nung osang tejangjaba agitsü atema camp director Rongsentoshi Jamir den iba number; 8798437988 ajanga tongteprateptsü kasa sangdong ajanga metedaktsüogo.

Kiphiri nung Inter School Cricket asayamung asayadaki

Dimapur, Monupii/May 7 (TYO): Kiphire District Cricket Association (KDCA)-i ayongzüka mezüngbuba Inter School Cricket Tournament (Under - 16 Boys), Public

Ground, Kiphire nung May 6 nü tenzükogo. Asayamung lapokba sentong nung EAC Kiphire, Kudazo alakteta jaoker liasü.

Asayamung lapokba sentong nung lokti pela agizükba o KDCA convenor-i jembi aser Kiphire jila GB-ia o tatsüka jembia liasü. Ajak senteper iba asayamung nung school ti-i shilem agidar, koba May 8 nü tembangtsü.

BENDANGLI OSANG : Tapak 7 nungi...

Vladimir Putin atema Russia tir kümsük...

Putin ya iba sentong nung aden aodang pa indang office nung kaket kar repranga liasü aser Kremlin indang corridors talang nung jaja ao aser khen anena jara nung noksa yangluwa aliba repranga liasü.

Putin ya gari ka nung mener Grand Kremlin Palace bushia aodang pa indang guard of honor ya ghonda ishika sükseta aser tzünglu nung meteta pa ata liasü.

Pai kümsük pongu buba tenzükang mezüngbuba nung Ukraine nung raraba nung "heroes" dang pelaba lemsatepa aser anüolen linüktem atema süoja jembi.

"Russia-i anüolen linüktem den jembishinü akatsü nungnanga mal. Ibaji par mulung, parnoki maneni Russia azüoktsü merangnera merangang, tashiyim amshiba tasa maneni amshiang, timtem agütsünera maneni agüjang, mesüra amalitep aser yimjung asoshi lenmang bushinera bushiang," ta Putin-i ashi.

NIsung 2,500 dak tema mena aliba Grand Kremlin Palace telungi pa ayaoka aidang parnoki teka maa pa agizük. Item nisungtem ya sorkari jaokbatem liasü, kong Russian sorkar nung ketdangsürtem aser American actor Steven Seagal

Putin-i Mongulbarnüa Russia nunger dang tarutsü nung yimchiyimjung alitsü nangzük, saka Ukraine amak tenzükba sülen nüburtem jangratema alitsü tasak kumogo.

Putin-i kümsük pongu buba nung tetsüng ajemokba mapang par linük telungzük nung pa anemer mal.

Yimtenren tsütsü pa asoshi tsükchir tesashitiba, opposition lenir Alexei Navalny ya February ita Arctic penal colony nung asü. Aser dangartem kar tepuokdak ayu mesüra linük yutsür jena ao.

BILEMDANGANG

"Temelenshiji pei dak nungi tenzüksüla."